

# Basef Ifimba Jon Nagi' Nanda'afi Fagafe'ma Wanifi

## Basef bandafi fagafe'ma wanifi Jon nanda'afi

- ves 1-4 Jon nasapa' dagala ananini naloma basef bu'wafi ma  
nogatopalopa alipunai Gaius
  - ves 5-8 Jon nanifela Gaiusa nanda' waf bu'wafi
  - ves 9-10 Diotrefes nanda' waf awafi
  - ves 11-12 Demitrius nanda' waf bu'wafi
  - ves 13-15 Basef du'wanif akutaifi
- 

<sup>1</sup>Ae' agiliwai igimafi esis Kristeni anda' anif basef fafe'mago ina' alipinai Gaius. Ae' okom maimailina endilisi a'owa'.<sup>a</sup> <sup>2</sup>Ina' alipinai, andabetena Goda hiahawes hiasi ina' nanda'asi sogataga bo'wes andeande'ma aowas akana negape andeande' si'i ambal ine'ili lagape andeande'.<sup>b</sup> <sup>3</sup>Fowa' ae' ame' basefa anom alipumi mafi'i matagame ma'ipi waf ine'ifi ma'i ina' naila basef endilisifi datima. Ame' basef ifimba andagalamena a'owa'. <sup>4</sup>Ae' sonahe a'owa' ma awasi sagaila basef endilisifi. Apa' ae' ina sonahe ma anis hiahawes daias sikila' sonagahema isimba, owa'atin.

## Gaius nanda' maol bu'wani Godi

<sup>5</sup>Alipinai ae' okom magamagailinai, maol hiani ina' nanda'ani ma negatopalopa amom sahin owani, inimba ina' nanda'an datima endilisi. Amom ina nati nogohnaepima negawam, owa'. Apa' ina' natolom numafiam atin.<sup>c</sup> <sup>6</sup>Amom hiami ma'ipa esis Kristen sagape na'ai ma okom ine'imi maimailam negatopalopam. Ae' ahali'ina ma negatopalopama gwa'aisi otamba mais mofa'as atin mogafe' anagon monda' maol Godi si'i okom ananiami maga'i.<sup>d</sup> <sup>7</sup>Dei' main, amom mafe' manda' maola agol Kraisi, apa' ina mofa' gwa'aisi maisa esis isimba sogololama Godi, owa'.

---

a 1 2 Jo 1   b 2 2 Jo 4   c 5 Ta 3:13   d 6 1 Ko 9:12,15

<sup>8</sup>Isimba atis apa' a' mondatopalopama gwa'aisi maisa monda' maola basef endilisifi Kraisi mogalomam.

### **Anona aman Diotrefes nanda' waf awafi**

<sup>9</sup>Ae' anda' anif basef fafe'mago esis Kristen, apa' Diotrefes anen a' okom ma'ima'i a'owa' ma nogape dembinai nigali'i. Anen ina naila basef ae'afi, owa'atin. <sup>10</sup>Nemaf mamahefa ae' i'i egafe'mago ina', ae' ewalapa basefa waf hiafi afamba anen nanda'afi. Anen nambaso'mas na'i basef fafifafi awafi findiwaefa ae'. Apa' ina nanda' waf afamba atef, owa'atin. Nanda' anef wapani na'amba. Nowa' alafugama amom sahin owan magawalipasa basef Godi ma'i mogafi'mai anini. Ea' anef wapani na'amba. Nasopama anis Kristen daias sa'i sogatopaloa amom amambai nelefas safe' sape ando' ma sios.<sup>e</sup>

### **Demitrius nanda' waf bu'wafi**

<sup>11</sup>Ina' alipinai, owa'i nila waf awafia, hapaifi. Nindaila bu'wafi atef. Epen ami nanda' waf bu'wafi, anin epen Godi. Apa' ami nanda' waf awafii, anin ina negawa God, owa'atin.<sup>f</sup>

<sup>12</sup>Epes hiasi sagasa'ma agol Demitriusi. Waf ananifi endilisifi fihimba'mapa anen aman bu'unai. Ae' wapani a'i anen bu'unai ea' ina' negawa basef ae'afi endilisifi.<sup>g</sup>

### **Basef ifimba du'wanif akutaifi**

<sup>13</sup>Ae' a'i i'ipina basef hiafi hi'ilif, apa' ae' andaiwa'ma enda' pen enda'ef fil pepa fegafe'mago ina', owa'. <sup>14</sup>Ae' okom ma'i atiasi efo'o itilina, dao afa' biafa ondatima wi'i basef ifimba.

<sup>15</sup>Ae' a'i opaf ine'ifi fope awanef nepe andeande'. Alipisi ine'isi sagape na'a'e sanda'menago dagala sandagalamago ina'. Ina' da'masago dagala ae'ani wapani nefe'mago esis sagape wambel ine'imbili atona atin. Ea' ma'uf.